

nome di la comunità, et quelli di Gorizia tolseno termene zorni 15 con dir voler avisar la Cesarea Maestà di questo, pur par che quelli di Gorizia a di primo, hore 16, siano scorsi una villa mia 4 lontan da Udene, e menato via bestiami etc. *Item*, aricorda si provedi di custodia a Latisana.

Di Bergamo, vidi lettere di sier Matio Michiel capitano e provedador, di 30, particular a suo fiol, con questo aviso. Come uno ambasador dil re de Ingaltera havea fato far una dieta a Zurich di molti primarii de' sguizari, et oferto, *nomine Regis*, darli 20 milia nobeli per la pace et page 3 per quelli torano l'impresa de Milan, et tanto più quanto acaderà star; *unde* sguizari havea tolto a risponder a di 22 dil presente secondo le loro comunità vorano, a le qual haveano a referir. E da poi tal partito, subito domino Anchise andò per stafeta in Ingaltera. Se diceva *etiam* ritrovarsi a' sguizari do oratori pontificii con ducati 60 milia et uno de l'Imperador. *Item*, a Ispruch si faceva un'altra dieta, ove si trovava domino Gilberto capitano di l'Imperador, di molti homeni, et a Zanth si faceva un'altra dieta per Grisoni zercha il dar de Valtelina. *Item*, che 'l re sopradito de Ingaltera oferiva a la impresa de Milano 18 milia persone; ma che se soprastava da dita impresa per non si atrovar vini. Et questo aviso è di 27 Lujo di Arditron di Catani, qual scrive a suo fratello Catanio.

Da poi fo lettere ozi di Alexandria; il sumario dirò poi.

Di Candia. Come a di 24 Zugno morite sier Alvise Emo ducha, a cui Dio perdoni. E nota. Quando fo creato, volendo tochar la man al Dose, cazete e fo tolto di mal augurio. Et 3 Alvise è morti, *videlicet* sier Alvise Trivixan capitano e viceducha, sier Alvise Capello si anegò, sier Alvise Malipiero che li successe, et questo.

248* Da poi disnar, fo Consejo di X con la zonta, et fo fato uno di zonta in luogo di sier Polo Capello el cavalier, per esser intrà sier Domenego Capello ordinario, et rimase sier Nicolò Michiel dotor et cavalier procurator.

Fu preso che tre zentilhomeni zoveni con ducati 425 per uno veniseno in Pregadi con titolo per do anni, et passadi posino scontar in angarie, daciai etc., *videlicet* sier Francesco Soranzo di sier Giacomo, fo dal Bancho, sier Bernardo Capello di sier Lorenzo, qu. sier Bernardo, sier Zuan Baxadona dotor, fo auditor nuovo, di sier Andrea consier. *Item*, fo preso che sier Lorenzo Contarini qu. sier Antonio, qual dia haver ducati 1000 per venir in Pregadi, et vol dar

ducati 700 indrio con dita di bancho fin do anni ducati 600, *ut supra*; il resto, ch'è 400, poter venir in Pregadi non metando balota fina li sia restituidi.

Fu preso una parte, che tutti quelli è stà serviti di pagar di altri danari che contadi il suo impresto, si dagino in nota *sub pœna* etc., et debano pagar in contadi, *aliter* siano fuora de' rezimenti, over officii havesseno auti, *ut in parte*; la qual si publicherà il primo Gran Consejo.

Fu preso, atento è molti voleano esser nominati Governador e dar danari, ch'el primo Gran Consejo si fazi Governador in luogo di sier Vetor Pixani che 'l primo compie, et per questa volta sia electo per scurtinio et 4 man di eletion.

Fo mandà, in questa sera, in campo ducati 6000.

A di 5, la matina, fo lettere di campo venute eri sera. Come erano zonti li a spagnoli 1300 ussiti di Verona, et 150 lanzinech, quali erano stà acetadi dal nostro Governador, et se li darà li danari promessoli. Sollicita il provedador Griti et il Governador per sue lettere danari, et scrive la quantità è zonta di quelli li fo mandati.

Di sier Zuan Paulo Gradenigo provedador zeneral, da Porto, fo lettere, di eri. Avisi *ut supra*; grandissima confusion in Verona etc., et si prepara lui per andar in su.

In questa matina, in le do Quarantie, avendo parlato questi zorni sier Ferigo di Renier l'avogador, et risposto domino Bortolamio da Fin dotor avochato per sier Zuan Francesco Miani, fo posto di procieder: ave 12 non sincere, 23 di no, 31 di si. *Iterum* 13 non sincere, 23 di no, 30 di si, et non è presa alcuna cosa. A un altro Consejo fo rimesso disputar il caso di novo.

Da poi disnar, fo Pregadi per far do Savii sora le acque per aver danari da mandar in campo.

Di Vicenza, lettere dil podestà e capitano, di eri sera. Come non si sente di sopra preparation alcuna di zente per Verona, *imo* si fortificava quella terra.

Di Candia, fo leto lettere di sier Antonio Zustignan dotor, capitano, viceduca e consieri, di . . . Zugno. Di la morte di sier Alvise Emo ducha, da colico, a di 24 dito, et come haveano armà 6 galie, e la camera rimasta molto povera.

Di Cataro, di sier Piero Zen retor e provedador, di . . . Lujo. Come quel sanzaco li vicino li havia mandato a dir che 'l Signor havia dato una rota contra Sophi; e *tamen* lui scrive à inteso il contrario

Di sier Sebastian Moro provedador di l'ar-